

PORUKE SURE EL-HUDŽURAT

Neka je hvala Allahu, dž.š., Gospodaru svih svjetova. Neka su salavat i selam na Poslanika Muhammeda, s.a.v.s., njegovu časnu porodicu, ashabe i sve sljedbenike, koji mjesec Ramazan koriste kako bi popravili svoje i stanje u društvu.

Braćo moja u Dini Islamu! Ovog prvog petka u mjesecu Ramazanu želim da nas podsjetim na neke od najvažnijih poruka sure El-Hudžurat (Sobe), a koje se tiču naših međusobnih odnosa. Jer, ako su odnosi među ljudima zdravi, zdrava je i zajednica. A ako ti odnosi nisu zdravi, onda se trebaju liječiti. Naravno, ako želimo zdravu zajednicu. A u svakoj zajednici je bilo, ima i bit će ljudi koji je ne žele vidjeti zdravom.

Sura se u skoro svim porukama obraća vjernicima, pa počinje sa pozivom njima da za mjerilo ispravnosti svojih djela uzimaju Kur'an i Sunnet. Tj. da vide šta Uzvišeni Allah i Poslanik, s.a.v.s., o tome kažu, odnosno da razmisle o tome kako bi Poslanik, s.a.v.s., postupio u određenoj situaciji.

Zatim navodi slučaj ljudi koji su podigli svoj glas iznad Poslanikovog, s.a.v.s., glasa, pri čemu Uzvišeni Allah prijeti takvim ljudima da im zbog toga može poništiti njihova dobra djela a da oni to i ne osjete. Time je indirektno upućena prijetnja onima koji, iako znaju propis ili hadis, ipak daju prednost svome mišljenju i po njemu postupaju. Time se, također, prijeti onima koji dižu svoje glasove iznad glasova uleme, jer su alimi nasljednici Allahovog Poslanika, s.a.v.s., u znanju. Kao što se prijeti i onima koji ne poštuju naše prvake, jer smo ih mi izabrali, bez obzira što se nekima od nas oni ne sviđaju. Jer ne postoji čovjek koji se svima sviđa i koji svima paše. Kad Muhammed, s.a.v.s., koji je bio potpuni čovjek, nije svima pasao, kako će onda neko od nas svima pasati?

Slijedeća poruka vjernicima jeste da dobro provjere informacije koje im donose nepouzidane i po lažima i grijesima poznate osobe, tj. da ih ne prenose dalje i da po njima ne postupaju sve dok ne budu sigurni da su te informacije važne i tačne, da ne bi nepravdu nanijeli osobama na koje se te informacije odnose. Ovo je danas veliki problem - REKLA – KAZALA. Ljudi jedva čekaju da čuju neki trač o nekome pa da ga brže-bolje prenesu drugima. Uopće se i ne zapitaju da li je ta informacija tačna. Bitno je samo da se ima o čemu pričati. Naravno, na informacije koje dobiju oni još nabešaju svoje mišljenje i još par izmišljenih informacija i onda poput virusa to prošire među ljudima, i tako nanesu bruku i sramotu nekome ili nekoj porodici, koju oni više do Sudnjeg dana saprati ne mogu.

Poslanik, s.a.v.s., upozorava da kada čovjek ne bi ništa drugo griješio, dovoljno bi mu bilo grijeha ako bi samo prenosio sve što čuje. S druge strane, Uzvišeni Allah nas poziva da ne slušamo i ne slijedimo nijednog krivokletnika prezrenog, klevetnika, koji tuđe riječi prenosi. Jer to su psihički poremećene osobe, koje svoju bolesnu dušu hrane i svoj ugled pokušavaju da grade na ponižavanju ili zavađanju drugih.

A ako dođe do zavade, Uzvišeni Allah od nas traži da zavađene pomirimo. Nije rekao: "Pomirite se!", već je rekao: "Pomirite ih!", jer je zavađenima jako teško da se sami pomire, pogotovo ako je do zavade došlo zbog uticaja treće strane.

Zatim Gospodar svjetova navodi neke radnje koje vode u zavadu i poziva vjernike da ih ne čine. Da se muškarci ne rugaju drugim muškarcima, jer su oni možda bolji od njih, a isto tako da se žene ne rugaju drugim ženama, jer su one možda bolje od njih. Mufessiri kažu da kada Uzvišeni Allah kaže "možda", onda je to sigurno tako. Mi imamo neka svoja mjerila po kojima sebe smatramo boljim od drugih, ali i prokleti šejtan je imao svoje mjerilo pa ga je Uzvišeni Allah prokleo i iz Dženneta protjerao. Uzvišeni Allah ima Svoje mjerilo vrednovanja ljudi, a ono se zove Takvaluk (bogobojaznost). S tim u vezi Gospodar svjetova u nastavku sure od nas traži da ne kudimo jedni druge i da ne nazivamo jedni druge ružnim nadimcima, jer je to ružan grijeh i velika nepravda.

Zatim Uzvišeni Allah od nas traži da izbjegavamo sumnje, jer su neopravdane sumnje grijeh. To nas opet vraća na ono ispitivanje situacije i dobivenih informacija, nakon čega nam dodatno zabranjuje da uhodimo i špijuniramo ljude. Jer uhođenje i špijuniranje vode ka uništenju povjerenja među ljudima. I na koncu, Uzvišeni nam zabranjuje da ogovaramo druge, te je ogovaranje poistovjetio sa jedenjem mesa svog umrlog brata, što je odvratna stvar. Koliko je samo (zbog ovih djela) uništeno prijateljstava, partnerstava, brakova, porodica, projekata, zajednica...?

Suru El-Hudžurat Uzvišeni Allah završava u visokom stilu, izjavom da On poznaje tajne nebesa i Zemlje i da On vidi ono što mi radimo, čime nas upozorava da vodimo računa o tome šta radimo jer On nad nama uvijek bdi. A pametnom je i išaret dovoljan!

Braćo moja! Ako nismo zadovoljni stanjem u društvu i želimo da ga popravimo, onda moramo krenuti od sebe, popraviti svoje ponašanje i svoje loše navike zamijeniti dobrim. To je proces koji se ne odvija i ne završava preko noći. Neće se sam pokrenuti i neće imati uspjeha ako se u njemu ne ustraje. Zato, radimo na sebi i brinimo se o svojoj porodici, a druge ljude i njihove porodice ostavimo na miru! Ako im možemo pomoći – pomozimo! A ako ne, nemojmo im odmagati!

Molim Dragog Allaha da nas uputi na djela kojima će On biti zadovoljan, da nas udalji od djela koja izazivaju Njegovu srdžbu i da nam pomogne da svoje i stanje u društvu okrenemo nabolje. Amin.